

職方典第六百六十四卷

江寧府部彙考十二

江寧府古蹟考一

本府

上元江寧二縣附郭

冶城本吳王夫差鑄劍之所一云孫吳卽今天宮地晉元帝太興初王導疾方士戴洋曰君本命在申而申地有冶金火相爍不利遂移冶城於石頭城東以其地爲西園是晉時猶爲冶處金陵邑城周顯王三十六年楚威王所置孫吳卽其地築城曰石頭城卽今石城門近清涼門處按丹陽記石頭城吳時土塢後因山加壁爲城因江爲池地形最爲險固隋置蔣州城唐韓滉五城皆相去不遠吳都城大帝黃龍元年築在淮水北五里據覆舟山下東環

平岡以爲安西城後帶元武湖以爲險前擁秦淮以爲阻周廻二十里十九步正門曰宣陽又南五里至淮水爲大航門時都城皆設籬曰古籬門晉元帝渡江復爲都改爲建康城仍吳之舊而增築焉凡十二門南曰宣陽開陽清明陵陽東曰建春東陽西曰西明閶闔北曰廣莫元

武延熹大夏宋齊梁陳皆因之

臺城在縣東北五里本吳後苑城卽宋建康宮城宋齊梁

陳皆因爲宮侯景之亂梁武帝餓死於此此城唐宋尙存按唐史張雄傳使別將趙揮據上元揮負其才欲治臺城爲府者是也按舊志新宮卽臺城也在上元東北五里有牆兩重晉成帝時蘇峻亂盡焚臺城宮室溫嶠以下咸議遷都唯王導固爭不許咸和六年使卞彬營治孝武太元三年謝安以宮室朽壞啟作新宮 倉城吳積貯之所近古苑城市 白馬城不詳

所在吳時舉烽火於此按江寧縣志在古江寧縣北三十里金陵故事云吳時沿江烽火臺二所一在石頭左一在白馬城 金城吳時所築今縣東北句容縣之瑯琊鄉卽其地吳後主

寶鼎二年於金城門外露宿迎神晉太興中王氏舉兵反將軍劉隗軍於金城初中宗於金城置琅琊郡咸康中桓溫爲琅琊內史出鎮金城後北伐行經金城見爲琅琊時所種柳皆十圍因嘆曰木猶如此人何以堪攀枝執條泫然流涕金陵志謂上元縣金陵鄉地名金城戍卽其地戚氏辨以爲金城卽前句容之瑯琊城其說是 建鄴城在冶城東晉太康三年分淮水

北爲建鄴治在宣陽門內

西州城卽古揚州城漢揚州治曲阿晉永嘉中遷於建康卽立

州城卽此太元末會稽王道子領揚州東府故號此城爲西州城西接冶城東臨運漚今朝天宮西州橋是晉時以西州爲丹陽尹治所謝安鎮新城欲俟經略粗定自海道東還後雅志未遂復入西州城慨然自失謝安爲時人所愛重及鎮新城以病輿入西州門薨後所知羊曇輟樂彌年行不由西州路嘗遊石頭大醉扶路唱樂不覺至州門左右曰此西州門曇悲感以馬策叩門詠曹子建詩云生存處華屋零落歸山丘因慟哭而去宋時徐羨之住西州高祖嘗思之卽步出西掖門往見焉殷景仁旣拜揚州羸疾遂篤上勅西州道上不得有車聲孝武時熒惑守南斗乃廢西州舊館使西陽王子尙移東府以厭之 琅琊城在古江乘縣界晉元帝

以琅琊王過江國人隨而居之因城焉齊永明元年移琅琊於白下此城遂廢按晉書江乘南岸有琅琊城立琅琊內史以治之齊武帝移於白下大起樓觀講武於此又南徐州記云江乘南岸蒲洲津有琅琊城與白下相近白下卽齊武所徙者永明六年講武琅琊城指白下琅琊城也 懷德城晉太興元年築按縣志在北城鄉舊志云在建初寺前卽王謝宅旁者非也

臨沂城在獨石山北臨大江今攝山之西白常村蓋其地距縣治三十八里 越城一名范

蠡城周元王四年范蠡築在古秣陵長千里今聚寶門外報恩寺西遺址猶存俗呼爲越臺按金陵故事范蠡佐越滅吳欲圖伯中國立城於金陵漢吳王濞敗保此城晉王含以水陸兵五萬逼淮溫嶠潛師渡水大破含軍於越城南盧循犯建康劉裕修治越城按越絕書其城越范蠡所築城東南角近故城望國門橋西北卽吳牙門將軍陸機宅故機入晉作懷舊賦望東城之行餘卽此 丹陽郡城漢元封二年置丹陽郡孫吳移治建康淮水南晉太康中始築城

在長樂橋東一里南臨大路城周一頃開東南北三門長樂橋卽今武定橋東南有長樂巷蓋自城東角之內外皆是 王含五城在丹陽郡城之東晉王含錢鳳戰敗乃率餘黨自柵塘

西置五城唐景雲中縣令陸彥恭於城側造橋渡淮水今五城渡是 秣陵城在宮城南八

里小長千巷內宋梁北齊皆於秣陵故城跨淮立橋柵當是隋併入江寧 東府城晉安帝

義熙十年冬城東府在清溪橋南臨淮水周三十里九十步簡文爲王時舊第後爲會稽王道

子宅道子錄尙書事以爲治所時人呼爲東府其子元顯亦錄尙書時謂道子爲東錄元顯爲

西錄西府車騎填湊東第門下可設雀羅東第卽後東府城也按會稽王傳嬖人趙牙爲道子

開東第築山開池列植竹木工用鉅萬帝常幸其宅謂道子曰府內乃有山因得游囑甚善然修飾太過道子無以對帝去道子謂牙曰上若知山是人力所爲爾必死矣牙曰公在牙何敢死其城東北角有土山卽牙所築也宋武帝領揚州日築東府城以居彭城王義康文帝元嘉中義康更開拓北塘浚西塹自後常爲宰相府第景和中嘗改爲未央宮明帝時建安王休仁鎮東府訛言東城出天子帝懼殺休仁而常閉東府不居桂陽王休範反車騎典籤茅恬開東府納賊齊高帝封齊王以東府爲齊宮梁太清三年侯景舉兵毀板牆以磚甃爲之紹泰末盡羅焚燬陳天嘉中徙治府城東三里臨淮水陳亡遂廢

湖熟城古縣名漢屬丹陽郡今在

丹陽鄉去縣五十里淮水北宋元嘉中遷越城流人於此

東宮城本吳永安宮在臺城東

門外宋元嘉十五年修永安宮爲東宮城

檀城本謝元別墅謂之城子墅亦曰墅城至宋

屬檀道濟故名檀城在今縣東清風鄉黃城橋之西

白下城本江乘之白石壘齊武帝以

其地帶江貢山移琅琊民居之唐武德九年罷金陵縣築城於此因其舊名曰白下貞觀九年復舊治城遂廢今靖安鎮北有白下城故基按南史齊武欲修曰下城難於動役劉係宗啟謫

役在東者上從之後武帝請武白下履行其城曰係宗爲國家得此一城 同夏城梁武帝

所生處大同元年置同夏縣因城焉 金陵府城按宮苑記隋大業六年置在元風觀南按

唐李孝恭再破巨賊欲以威重夸遠俗築築石頭城陳廬微自衛此又唐府城也 韓滉五

城在石頭唐德宗狩梁州韓滉觀察江東乃築石頭五城自京口至土山 南唐都城周二

十五里四十四步楊吳順義中築初六朝舊城在北去秦淮五里故淮上皆立浮航緩急則撤

航爲備孫吳沿淮立柵吳王濞時徐溫改築稍遷近南夾淮帶江以盡地利西據石頭南接長

干東以白下橋爲限北以元武橋爲限所跨水皆所鑿城壕也有上下水門以通淮水出入宋

元皆因之 故江寧縣城今縣治西南七十里南陵江寧浦周六里餘 建康府治初在

天津橋北後徙東錦繡坊 昇州治卽今內橋北 太社太稷壇晉元帝建武元年立在

古都城宣陽門外郭璞卜遷之按金陵志在舊江寧縣東二里 北郊壇晉安帝時立在覆

舟山南宋孝武大明三年移於鍾山北原定林寺山巔有平基二所闊數十丈卽其地 雩

壇梁天監九年有事雩壇遂移於東郊在籍田之域內 籍田壇在東郊十五里梁普通三

年移置有便殿齋省望耕壇祈年殿沃野千畝

天地壇在洪武門外壇制闢四門而緣以

朱垣內復爲垣圍列壇中居樂舞上爲大祀殿前爲齋宮大垣之左列神樂觀樂舞禮生設犧牲所養犧牲於內今廢

上元舊社壇在白下門外尉廨東

夢筆驛在治亭江淹嘗宿

此夢人自稱郭璞謂曰吾有筆在公處可見還淹探懷中五色筆一枝授之後爲詩絕無美句古國門梁天監七年作國門於越城南在今高座寺東南澗橋北越城東

古望國門按南

史侯景令羊侃率千騎屯望國門其地在越城東南

南郊壇吳太元元年始祭南郊晉元

帝建武二年定郊兆於建鄴之南太興二年立於城南十餘里在長樂橋東籬門外宋孝武大明三年遷於牛頭山西在宮之午地梁武帝卽位南郊爲壇在國之陽今城東與婁湖相近

方盟壇陳宣帝大建十年立婁湖側臨壇誓衆分遣大使頒盟誓警四方以備周人

明堂

在國學南宋大明五年立其牆宇規制一如太廟十有二間以應蓍數無古三十六戶七十二牖之制梁天監中修築陳亡毀

太廟晉中宗置在秦淮西孝武大元十六年改築宋以後

仍之至陳廢接通典江東太廟門北有竹葉文石元嘉中得之陸澄云晉武帝郊禘石也

新亭壘宋孝武入討元凶劬柳元景至新亭依山築壘東西據險察賊衰竭乃開壘鼓譟以奔之賊衆大潰按金陵志亭在城西南十二里壘不存元徽二年桂陽王休範舉兵潯陽蕭道成屯兵新亭以當其鋒築新亭城壘未畢賊前軍已至道成登西垣使陳顯達等與賊水戰大破之侯景故壘在梧桐灣古大航城在其南梁紹泰元年北齊兵至建康陳霸先問計於韋載載曰齊人若分兵據三吳之路略地東境則大事去矣今可於淮南因侯景故壘築城以通轉輸乃遣載於大航築侯景故壘使杜稜守之烏衣園在烏衣巷東馬光祖立城南有王

謝故居一堂扁曰來燕歲久傾圯馬光祖撤而新之堂後建亭館

繡春園宋時重建在府

社壇東隸運司端平二年高定子記云昔得繡春園名及來將漕訪其遺址無知者有造船塢餘地益以廢圃乃築之南苑在瓦官寺東北宋明帝末年張永乞借南苑帝云且給三百

期滿更請後帝葬於此梁改名建興苑侯景攻臺城裴之高營於南苑卽此婁湖苑齊武

帝永明元年望氣者言婁湖有天子氣乃築青溪舊宮作婁湖苑以厭之陳更加弘壯後其地

爲光宅寺

烏榜村按圖經初立西州城未有籬門立烏榜遂以名村

銅螭署在臺城

本洛陽故物晉平姚秦遷於此

鷄鳴埭在湖溝上齊武帝早遊鍾山射雉至此始聞鷄鳴

藥園壘在覆舟山南晉劉裕築以拒盧循

賀若弼壘隋伐陳若弼過江於蔣山龍尾築壘

在北二十里

韓擒虎壘在石頭城西

到公石按慶元志梁到溉第臨淮水齋前地有

礪石長丈六尺武帝戲與賭之溉輸卽迎置華林園宴殿前謂到公石云

華林園在臺城

內本吳舊宮苑也宋元嘉中更修廣之鑿天淵池起景陽樓鳳光諸殿梁武帝造重閣陳永初中又造聽訟殿臨政殿隋平陳俱廢按世說晉簡文帝在華林園謂左右曰會心處不必在達
翛然林木便有濠濮間趣覺鳥獸禽魚自來相親按宋書何尙之見造華林園在盛暑時諫宜
休息不許曰小人嘗自暴背此不足爲勞按運曆圖齊高帝建元二年幸華林園褚彥回彈琵琶王僧虔彈琴沈文季爲子夜吟王敬則舞劍王儉獨跪誦封禪書帝曰此盛德事吾何以堪
西園一名別苑卽冶城地王導所築按晉書成帝幸司徒府遊觀西園卽此太元十五年武帝
爲江陵沙門法新於中立寺以冶城爲名至桓元盡移僧出以寺爲苑

東籬門園在東府

籬門內按南史何點信佛居東籬園孔德璋爲築室豫章王嶷命駕造點點從後門逃去竟陵

王子良聞之曰豫章王尙望塵不及吾當望岫息心後點在法輪寺子良就見之點角巾登席子良欣悅無已遺點稽顙夜酒杯徐景山酒鎗園有卞忠貞塚點植花塚側每飲必舉酒酹之沈約郊園在鍾山下

江潭苑在新林路西梁大同初立按輿地志武帝從新亭鑿渠通新林浦又爲池通大道立殿宇一名玉遊未成而侯景亂事寢上林苑在鷄籠山東宋孝武

大明三年築初名西苑梁改曰上林其地有古池俗呼爲飲馬塘亦曰飲馬池其西又有望宮

臺芳林苑一名桃花園齊高帝舊宅也帝卽位修舊宅爲清溪宮一名芳林園後改爲苑

永明五年禊飲於芳林苑王融曲水詩序云載懷平浦乃睨芳林謂此梁天監初賜南平元襄王爲第益加穿鑿蕭範爲記言藩邸之盛莫過於此方山苑齊武帝立在方山側半

山園宋王安石營王荆公居半山園有詩示蔡天啟云今年鍾山南隨分作園囿又次吳氏女子詩註云南朝九日臺在孫陵曲街旁去吾園數百步桂林苑在落星山之陽吳都賦曰

數軍實於桂林之苑樂遊苑卽晉藥園壘處宋元嘉中以其地爲北苑更造樓觀改曰樂

遊苑孝武大明中造正陽林光殿於內侯景亂焚毀略盡元嘉十一年三月禊飲於樂遊苑會

者賦詩顏延之爲序

博望苑在府東七里齊惠文太子所立輔公祏城是其地沈約郊居

賦云睇東嶽以流目心悽愴而不怡昔儲皇之舊苑寶博望之餘基謝朓詩戚戚苦無悵攜手
共行樂尋雲陟累榭隨山望闕閣遠樹曖仟仟生烟分漠漠魚戲新荷動鳥散餘花落不對芳
春酒遙望青山郭

芳樂苑齊東昏侯築在臺城卽臺城闕武堂爲芳樂苑山石皆塗以彩
色跨池水立紫閣諸樓觀又於苑中立店肆以潘妃爲市令又作土山開渠立埭苑中時百姓
歌云闕武堂種楊柳至尊屠肉潘妃沽酒

北苑南唐築在城北不詳其所徐鉉徐鉉湯悅
有北苑侍宴詩序云望蔣嶠之嶽崎祝爲聖壽泛潮溝之清淺流作恩波

元圃齊惠文太

子築在臺城北惠文太子性奢麗宮中多雕飾精綺過於王宮開拓元圃與臺城北塹等其樓
觀塔宇多聚奇石妙極山水慮帝望見旁列修竹內施高障造遊牆數百間按輿地志圃有明
月觀婉轉廊徘徊橋內作淨明精舍梁書昭明太子於元圃立館以延朝士番禺侯軌稱此中
宜奏女樂太子不答誦左思招隱詩何必綵與竹山水有清音軌大慚

王鸞墅在鍾山按

南史鸞歷黃門郎司徒右長史有舊墅在鍾山八十餘頃與諸宅及故舊共佃之嘗謂人曰我

不如鄭公業有田四百頃而食常不周以此爲愧梁武帝於鍾山西造大愛敬寺齋塋在寺側者卽王導賜田也帝宣旨取之焉曰此田不賣若勅取亦不敢言帝怒評價取之 郭文舉

書臺宋志天慶太乙殿卽文舉讀書處按金陵故事文舉爲王導所重築臺於冶城以處之

望耕臺在白上村宋文帝嘗登此以觀公卿親推 日觀臺一名司天臺在臺城內按宮苑

記臺城西有日觀臺祥符圖經云宋司天臺也 九日臺在商飈館岡上齊武帝每九月九

日宴羣臣於此 昭明讀書臺一在蔣山定林寺後北高峯上一在湖熟鎮皆昭明讀書處

今遺址尙存 獨足臺在舊宮城陳將亡有一鳥獨足上臺以喙畫地書云獨足上高臺茂

草化爲灰欲知我家處朱門傍水開後遷洛陽果賜第洛水旁 南唐月臺按胡宿高齋記

在子城東南唐李氏因城作臺望月人呼爲月臺下臨深壕北面覆舟南對長干西望冶城立

齋其上高侔麗譙廣容晏息用謝宣城晏坐之意曰高齋 觀象臺在鷄鳴山之巔明改名

欽天山欽天監觀天象於此重門週垣官廳圍房欽天監儀正等官司之上有璇璣玉衡量天

尺渾天球銅壺滴漏日晷風竿星宿海元至正元年所製有銘記年月日時精工典麗觀者欽

爲法物又有乾坎艮震巽離坤兌銅山八座八龍盤繫中一龍斷二爪相傳此龍乘雲霧飛入後湖中故斷其爪而瑯璚之今俱無 秦皇馳道始皇三十六年東遊自江乘渡馳馬於

此 宋帝馳道宋書大明五年孝武初立馳道自閭闔門至朱雀門爲南馳道自承明門至元武湖爲北馳道宮苑記宋築馳道爲調馬之所 黃城大路在清風鄉黃城村梁太清二

年侯景遣軍至江乘拒邵陵王綸趙伯超謂綸曰若從黃城大路必與賊遇不如徑詣鍾山突據廣莫門城圍必解 竹里路在縣東北六十里有十里橋北濱大江父老云昔路行山澗

西接東陽遠攝山之北由江乘連洛至建康宋武帝討桓元其路經此 石闕晉元帝欲於

宮前立二闕衆議未定王導指牛首山爲天闕不復立宋孝武大明七年於博望梁山立雙闕築石闕於端門外夾道置之其上隱起奇禽異獸之狀孝武帝詔陸倕爲銘冠絕當時賜以束帛朝野榮之 青溪柵在古城東蘇峻亂燒去柵卞壘父子死之隋平陳斬張麗華於柵下

孫楚酒樓在城西李白翫月於此達曉歌吹日晚乘醉著紫綺裘烏紗巾與酒客數人棹歌秦淮往石頭訪崔四侍御相傳今莫愁湖東卽其處 東南佳麗樓按建康志在銀行街舊爲

賞心樓久廢景定元年馬光祖建改曰東南佳麗樓卽今縣治基

南礪樓按舊志在府城

西南近何尙之宅南礪卽今躍馬澗

來賓樓在聚寶門外西南馴象街北明洪武間建卽

宋豐裕樓舊基

治城樓晉建在吳治城舊基卽謝安石王羲之同登處宋嘉定中重建接

忠孝堂

入漢樓在石頭城晉義熙八年建加累入於雲霄連堞帶於積水

青漆樓在

臺城內齊書云世祖興光樓上施青漆時人謂之青漆樓

景陽樓在法寶寺西南宋精銳

中軍寨內遺址尙存呼爲景陽臺明旗手衛營內地宋元臺二十二年修廣華林園築景陽山

始造景陽樓孝武大明元年紫雲出樓中狀如煙改爲慶雲樓宮苑記云齊武帝置鐘景陽樓

上令宮人聞鐘聲並起粧飾

百尺樓在南唐宮中唐主於宮中作高樓召羣臣觀之衆皆

嘆美蕭儼曰恨樓下無并耳唐主問其故對曰以此不及景陽樓唐主怒貶儼舒州

忠勤

樓在建康府治中宋淳祐十年吳淵建

烽火樓在石頭城西南最高處吳時舉烽火之所

宋元嘉中魏太武至瓜埠聲欲渡江文帝登烽火樓極望不悅謂江湛曰北伐之計同議者少

今日貽大夫之憂在予過矣

芙蓉樓舊名北樓在丹陽城北

重譯樓在馴象街南與

來賓樓相對

鶴鳴樓在三山門外西關中街北

醉仙樓在三山門中街南

集賢

樓在瓦屑壩西

樂民樓在集賢樓北

輕烟樓在江東門內江關南街

淡粉樓與

輕烟樓相對

翠柳樓在江東門內西關北街

梅妍樓與翠柳樓相對自來賓以下十

樓皆洪武初建樓每座皆六楹高基重簷棟宇宏敞各顏以大書名扁各在市廛交易地以爲客旅遊樂憩息之所抑柔遠之道歟今皆廢

昇元閣一名瓦官一名吳興按京師寺記瓦

官寺有瓦官閣梁時建高二百四十尺吳順義中改寺爲吳興寺閣因名吳興南唐昇元初改

寺爲昇元閣遂名昇元南唐書云閣因山爲基高可十丈平旦閣影半江開崇勝戒壇院近昇

元閣故基院中建廬舍那佛閣亦高七丈里俗猶呼爲昇元閣按龔穎運曆圖開元九年江寧

縣瓦官寺閣西南久傾因風自正江南野史唐狄仁傑爲溧陽主簿羣公休沐宴昇元閣仁傑

卽席和詩有雲散便凝千里望日斜常占半城陰句坐客皆驚南唐書云昇元閣因山爲基高

可十丈開寶中王師收復人避難於其上越兵舉火焚之閣基舊有遺碣云抱鷄昇寶位走馬

出金陵子建居南極安仁秉夜燈東陵驕小女騎虎渡河冰其識皆應李白橫江詞人言橫江

好我道橫江惡一風三日吹倒山白浪高於瓦官閣

延祚閣在冶城後岡上宋太始中建

延祚寺閣因名

臨春閣結綺閣望仙閣陳至德二年建在華林園光昭殿前高數十丈並

數十間窗牖戶壁欄楹之類皆以沉檀爲之飾金玉珠翠珠簾寶帳服玩瑰麗近古未有積石爲山引水爲池植以奇樹雜以花藥後主自居臨春張麗華居結綺龔孔二貴嬪居望仙並複道往來使女學士與狎客賦詩采其尤豔麗者被以新聲有玉樹後庭花臨春樂等曲君臣酣歌自晝達夜有女學士袁大捨獻春樂詞以諷之 元武觀宋建在元武湖上南朝嘗臨此

閨武蔡景歷拜度支尙書日駕幸元武觀宴百官恐景歷援舊式午後拜官不預特令早拜重之也 通天觀在華林園官苑記云梁武帝於景陽山東嶺起通天觀觀前起重閣閣上曰

重雲殿下曰光嚴殿殿當街起二樓左曰朝日右曰夕月塔道繞樓九轉極其巧麗金陵故事 晉孝武講孝經於通天觀則晉時已有之矣 齊雲觀在臺城內陳建後主令採木湘洲擬

造正寢至牛渚磯盡沒旣而漁人見棧於海上復起齊雲觀國人歌曰齊雲觀寇來無際畔

儀賢堂吳建初名聽訟堂在宣陽門內每歲策孝秀考學士學業歲暮習元會儀於此梁改曰